

IDEAS PARA UNA HOMILÍA CON NENOS 14 MAIO 2023

Xesús maniféstase con amor VIVO que nos invita a amar

1. VER: Necesitamos un CORAZÓN ben acompasado

- O máis importante na vida é querer e ser querido. Que importante é a familia, os amigos, compartir a vida, dar e darse aos outros.

*Que facedes cos amigos?
Que valoras máis da familia?*

2. XULGAR: Xesús quérenos e invítanos a amar

- No evanxeo de hoxe, Xesús, antes de irse, déixanos o Espírito Santo para que ***“estea sempre convosco”***. Ademais ***“mora convosco e está en vós”***. E engade que ***“se me amades, gardaredes os meus mandamentos”***.

QUE NOS QUERE DICIR XESÚS?

- Xesús **quérenos cun amor VIVO**
Resucitou e quedou connosco para compartir as nosas inquietudes, alegrías, festas...
podemos experimentar o seu amor vivo, pois é o amigo que nos quere, o amigo fiel que espera de nós unha resposta de fidelidade e de amor.
- Xesús **regálanos o Espírito Santo** para ***“que estea sempre convosco”***. Antes de irse ao ceo
déixanos o mellor dos agasallos, o Espírito Santo que é esa forza que necesitamos, ese

ver as cousas doutra maneira, ese sentir os demais doutra forma...O Espírito Santo é

como a luz que non se toca, non cheira nin se oe pero que fai que andemos con

confianza, que vexamos a todos como irmáns...

- Xesús **convídanos a amar**, “se **me amades, gardaredes os meus mandamentos**”.

Amar a Xesús é amar o Pai, o Fillo e o Espírito Santo (os tres primeiros manda-

mentos). E Xesús non quere que só o amemos a El senón a todos (os outros

sete mandamentos). Fixádevos a quen debes amar máis e como demostrarllo.

- Hoxe é a “Pascua **do Enfermo**: ama, coida, acompaña os enfermos. “Déixate cativar polo seu rostro desgastado”, dinos o lema.

***Que fai o Espírito Santo?
Cales son os mandamentos?***

3. ACTUAR: Déixate coidar por Xesús

- Agradezamos este domingo que Xesús quedou connosco para ser o noso compañeiro, é o noso amigo fiel.
- Agradezamos tamén que o Espírito Santo sempre vai connosco, iluminándonos, fortalecéndonos, aínda que ás veces non o sintamos preto.
- Facede un mural cos mandamentos, resumidos no amor.... E aprendédeos de memoria.
- Que cada neno leve unha candeia e acendémolas todas ante o altar. Alguén di: “ofrecemos estas candeas que representan o lume do Espírito que queremos recibir e o lume do noso amor que queremos compartir”. Reparte “corazón” polo mundo.
- Visitemos a algún enfermo ou unha residencia de anciáns...

Que imos facer?

LECTURAS

FEITOS 8, 5-8. 14-17: *Impoñíanlles as mans e recibían o Espírito Santo.*

Naqueles días, Filipe baixou á cidade de Samaría e predicáballes a Cristo. O xentío unanimemente escoitaba con atención o que dicía Filipe, porque oíran falar dos signos que facía, e estábanos vendo: de moitos posuídos saían os Espíritos inmundos lanzando berros, e moitos paralíticos e eivados curábanse.

A cidade encheuse de alegría. Cando os apóstolos, que estaban en Xerusalén, se decataron de que Samaría recibira a palabra de Deus, enviaron a Pedro e a Xoán; eles baixaron ata alí e oraron por eles, para que recibisen o Espírito Santo; pois aínda non baixara sobre ningún; estaban só bautizados no nome do Señor Xesús. Entón impoñíanlles as mans e recibían o Espírito Santo.

Palabra do Señor.

SALMO 35: Aclama o Señor, terra enteira.

I PEDRO 3, 15-18: *Morto na carne pero vivificado no Espírito.*

XOÁN 14,15-21: Pedireille ao Pai que vos dea outro Paráclito.

Narrador: Na aquel tempo, díxolles Xesús aos seus discípulos:

Xesús: -«*Se me amades, gardaredes os meus mandamentos. E eu pedireille ao Pai que vos dea outro Paráclito, que estea sempre convosco, o Espírito da verdade.*

*O mundo non pode recibilo, porque non o ve nin o coñece; vós, en cambio, coñecédelo, porque **mora convosco e está en vós.** Non vos deixarei orfos, volverei a vós.*

Deica pouco o mundo non me verá, pero vós verédesme e viviredes, porque eu sigo vivindo.

Entón saberedes que eu estou no meu Pai, e vós en min e eu en vós.

O que acepta os meus mandamentos e os garda, ese ámame; e o que me ama será amado polo meu Pai, e eu tamén o amarei e manifestareime a el»

Palabra do Señor.

(Narrador-Xesús).